

06 AUG 1996

Mahathir-Wawancara

MAHATHIR YAKIN ANWAR BOLEH AMBIL ALIH JAWATAN PM

KUALA LUMPUR, 6 Ogos (Bernama) -- Perdana Menteri Datuk Seri Dr Mahathir Mohamad berkata beliau yakin timbalannya Datuk Seri Anwar Ibrahim boleh mengambil alih jawatan daripadanya tanpa membawa apa-apa kesan buruk kepada Umno atau memaksanya berhenti.

Katanya, beliau juga yakin Anwar mampu meneruskan apa yang telah dilakukannya selama ini sungguhpun Anwar berbeza daripada beliau.

" Saya tidak percaya bahawa dia akan menjadi 100 peratus saya. Tidak ada orang yang boleh menjadi 100 peratus saya dan saya tidak boleh menjadi 100 peratus Anwar juga," kata Dr Mahathir pada Wawancara Khas dengan RTM malam ini sempena 15 tahun beliau menjadi Perdana Menteri.

Beliau, yang diwawancara Ketua Pengarang Kumpulan Utusan Melayu Johan Jaaffar, berkata memang terdapat banyak teori konspirasi mengenai hubungan beliau dengan Anwar sehingga menimbulkan kedua-dua mereka acap kali membuat berbagai-bagai kenyataan untuk mengendurkan suasana.

Menurutnya, ini ialah kerana pelbagai pihak selalu mencari udang di sebalik batu sedangkan tidak ada udang sama sekali.

"Perkara ini seperti yang ternyata tidak lebih daripada itu. Tetapi kita orang Melayu terutamanya suka sangat memikir. Kalau dia memberi kepada saya sesuatu apa tujuan di sebaliknya? Kita selalu bertanya. Kita sepatutnya terima at face value, apa yang dapat itulah yang kita terima.

"Saya terpaksa berkali-kali menjelaskan perkara ini kerana saya dapati ini menimbulkan bermacam-macam keadaan yang tidak menyenangkan dalam parti," katanya.

Ditanya sama ada beliau pada bila-bila masa pernah mencurigai kesetiaan dan kejujuran Anwar, Perdana Menteri menjawab: " Kadang-kadang bila terlangsung sangat diserang oleh macam-macam laporan, timbul juga perasaan bahawa mungkin benar. Saya berpendapat bahawa walaupun saya percaya tak percaya, satu hari saya mesti berundur daripada jawatan ini.

"Dan kalau saya tidak mempunyai kepercayaan kepada orang yang menggantikan saya, agak sukar bagi saya berhubung dengannya."

Dr Mahathir berkata beliau dan Anwar selalu mengadakan perbincangan dan pendirian Umno bukan hasil daripada beliau semata-mata tetapi hasil mesyuarat dan mesyuarah di dalam parti.

" Inilah cara parti diuruskan dan saya yakin kalau saya tidak ada dalam parti, parti akan diuruskan, mungkin stail yang berbeza tapi matlamatnya sama," kata beliau.

Perdana Menteri juga ditanya mengenai penglibatan anak-anaknya dalam bidang politik dan perniagaan dan sama ada beliau memberi sebarang syarat atau sempadan ataupun kawalan di atas penglibatan mereka.

"Sebenarnya ada, sehinggakan kadang-kadang anak-anak saya merasa marah juga kerana dilarang itu tidak boleh, ini tidak boleh, macam-macam. Saya tidak memberi tempat langsung dalam politik dan saya tidak tolong walaupun ada minat.

" Ada yang seorang itu ada minat tetapi saya tidak hendak tolong dia. Yang itu hal dia. Kalau hendak tahan pun, tidak adil juga. Tetapi hendak kata saya hendak sorong dia ke hadapan, saya tidak buat," katanya.

Dr Mahathir berkata dalam bidang perniagaan, anak-anaknya boleh berniaga tetapi seboleh-bolehnya jangan melibatkan kerajaan, sambil menambah kata: "Kalau hendak berniaga, bernialah dengan orang lain."

Ditanya mengenai sesetengah pandangan bahawa beliau gemar membina monumen, Perdana Menteri berkata beliau bukan berhasrat untuk membina

monumen kerana monumen tidak perlu bagi dirinya.

Tetapi, bagi sebuah negara perlu ada sesuatu yang boleh rakyat banggakan dengannya sebagai satu tanda.

"Kita kata negara kita sudah maju tetapi tidak ada satu pun yang menunjukkan bahawa kesan kemajuan ini yang boleh dilihat oleh orang biasa.

" Jadi kalau kita ada menara sekurang-kurangnya kita tahu kita ada menara dan ini adalah sesuatu yang boleh rakyat banggakan, bukan saya," katanya.

Sehubungan itu, beliau berkata: " Saya tidak perlu kepada monumen apa-apa. Satu sahaja monumen, yang rendah, itu yang kita hendak kemudian. Yang tinggi yang kita buat kadang-kadang merupakan monumen tetapi tidak kurang juga semua ianya adalah kemudahan, kemudahan untuk pembangunan negara kita, infrastruktur," katanya.

Sebagai contoh, Perdana Menteri menyebut Kuala Lumpur City Centre (KLCC), iaitu bangunan yang tertinggi di dunia.

Katanya, oleh kerana KLCC dibina atas tanah yang terlalu tinggi harganya, perlu tanah itu dapat dimaksimumkan daripada kos tanah.

" Kalau di atas tanah yang terlalu tinggi dibina pondok tentulah rugi. Jadi kita bina KLCC supaya kita dapat maximise daripada kos tanah yang kita guna," katanya.

Mengenai orang Melayu, Dr Mahathir berkata beliau menganggap orang Melayu lebih agresif hari ini berbanding semasa beliau menulis buku "The Malay Dilemma" (yang diterbitkan pada 1969).

" Kadang-kadang terlalu agresif sehingga kempen untuk mendapat jawatan pun begitu dahsyat sekali. Tetapi mereka tidak lagi berasa mereka kekurangan sesuatu, tidak ada 'inferiority complex'. Ramai daripada mereka percaya apa yang boleh dibuat oleh orang lain mereka juga boleh buat dan ini adalah satu perbezaan antara Melayu semasa kita berjuang untuk kemerdekaan yang mana ramai daripada orang Melayu pada ketika itupun tidak yakin bahawa kita boleh merdeka dan memerintah diri sendiri."

Dr Mahathir juga bercakap mengenai kemungkinan berlakunya 'backlash' akibat daripada kejayaan yang cukup luar biasa yang dicapai oleh orang Melayu pada hari ini.

Katanya, sekiranya pihak yang bertanggungjawab seperti kepimpinan kerajaan tidak mengingatkan orang Melayu mengenai betapa pentingnya mereka jangan lupa tentang kejayaan mereka dahulu, beliau tidak yakin orang Melayu boleh mengurus kejayaan mereka.

Ini ialah kerana mengurus kejayaan juga mempunyai masalah sama seperti mengurus kemiskinan atau kegagalan.

" Tetapi kita sering memperingati diri kita dan kita harap generasi muda terutamanya akan dimaklumkan tentang asal usul mereka," katanya.

Perdana Menteri juga ditanya apakah beliau fikir isu perpaduan kaum di Malaysia akan berakhir atau selesai untuk masa akan datang.

" Zaman berubah. Kalau dulu, tumpuan kita ialah kepada asimilasi. Di mana-mana negara juga tidak ada lagi usaha untuk 'assimilation', bahkan di Amerika Syarikat mereka sering bercakap berkenaan dengan 'roots' asal-usul mereka. Jadi kalau kita hendak balik kepada soal asimilasi mungkin sukar.

" Kalau kita sudah terima bahawa itu tidak mungkin, kita perlu cari jalan lain untuk merapatkan perhubungan kaum ini," kata beliau.

Perdana Menteri juga tidak menolak kemungkinan bahawa isu perpaduan kaum, yang kini diketepikan oleh kerana keadaan ekonomi yang baik dan politik yang stabil, akan bangkit semula apabila timbul masalah kemelesetan ekonomi.

" Memang mungkin kalau berlaku kemelesetan. Tetapi harapan saya ialah kali ini kalau ada kemelesetan tidak ada perbezaan antara kaum. Yang Cina pun akan menghadapi masalah, yang Melayu pun masalah yang sama dan yang India pun masalah yang sama. Jadi tidak lagi ada perasaan iri hati dan

cemburu kerana orang lain lebih baik daripada kita."

Dr Mahathir kemudian ditanya satu soalan hypothetical -- apakah nasib orang Melayu akan lebih baik sekiranya negara ini dari segi penguasaan politiknya didominasi oleh orang Cina sepertimana orang Cina kedudukannya lebih baik sekarang kerana penguasaan politik di tangan orang Melayu.

Sambil mengakui soalan andaian itu sukar dijawab, Perdana Menteri berkata beliau fikir kebanyakan orang Cina adalah pragmatik.

Katanya, kalau orang Cina merupakan 80 peratus daripada penduduk Malaysia, beliau yakin orang Melayu perlu khuatir tetapi dalam keadaan sekarang Melayu adalah 56 peratus daripada penduduk Malaysia manakala orang Cina cuma 32 peratus.

" Mereka (rakyat Malaysia keturunan Cina) kerana pragmatis mereka, tidak akan membuat sesuatu yang akhirnya membawa kebinasaan kepada diri mereka," kata Dr Mahathir.

Perdana Menteri juga berkata masalah yang ditimbulkan oleh kehadiran lebih sejuta pekerja asing di negara ini sekarang merupakan perkara yang harus ditangani kerana ia merupakan satu "masalah kejayaan".

Masalah ini berpunca daripada program kerajaan pada suatu masa dulu yang menumpu kepada peluang kerja, malah kerajaan ketika itu sanggup syarikat-syarikat tidak membayar hasil kepada kerajaan asalkan mereka boleh mewujudkan peluang pekerjaan.

" Tetapi tiba-tiba tanpa kita dapat membuat persediaan, semua rakyat kita mendapat kerja. Kita tidak boleh memberhentikan industri yang memerlukan kepada tenaga kerja ini dengan serta merta. Jadi terpaksa kita lanjutkan dan dengan itu kita terpaksa menerima pekerja asing," katanya.

-- BERNAMA

AU AHH